

第一冊 佛學類之二·之二

佛說阿彌陀經摘注接蒙義蘊合刊
大方廣佛華嚴經講述表解

李炳南老居士全集編輯委員會 印行

李炳南老居士全集序

吾師稷下 雪廬老人，早年習儒業，淹貫諸經，旁及子史法學醫學，尤深於詩。其後入佛，學唯識於南昌梅擷芸光義大士，皈依淨宗十三祖印光大師，又從明師參禪學密，最後發大悲心，自行化他，專宗淨土。

師嘗為仕於莒，德加於民，功昭於世，惟志不在人爵，乃與莊太史心如同纂莒志，事成，入衍聖公幕，孔上公尊其賢，待之以殊禮。

民紀己丑之春，師從上公浮海臺灣，遂寓臺中，達數十年，身似孤僧，全心弘道。以釋典儒經詩文醫術接引羣機，同修淨業。次第興建臺中佛教蓮社、慈光圖書館、慈光育幼院、菩提仁愛之家，設立國學班、念佛班、男女青年弘法團、明倫社、大專佛

學講座、內典研究班、論語講習班、社教科、國學啟蒙班、明倫雜誌社、明倫廣播節目供應社、青蓮出版社，暨各種文化慈善事業基金會，弘化規模日大，影響深遠。

師在各道場弘佛弘儒，並應聘各大學暨獨立學院，講授詩禮醫學，數十年如一日，晝夜講說無虛時。傳授儒經，以道德仁藝為綱，基於倫常禮教，期諸學者樂天知命，修己安人。披演內典，必依祖注，契理契機，指歸念佛，助以深信因果，務求當生成就。言教所至，身教先之。感人至深，度化無數。匡廬遺業，靈巖道風，由是大弘於此域。人心向善，世德日淳。不惟佛日增輝，而夫子之鐸亦以是遠振他方矣。

歲丙寅，夏曆三月初五日寅時，師應前一年預示，法緣已了，無疾歸西，春秋九十有七。臨去之際，猶囑助念諸弟子，一心不亂。七七日後茶毘，得諸色舍利千餘顆。生前經注、講表、詩文、著述甚多，或已梓行，或存手稿。依於治喪會議，彙印全集

，以澤後世。事經兩稔，方竣其編。類分佛學、儒學、醫學、詩文、遺墨、書牘，後哀追思諸文以附。

師平生大願誠於中，化度之功著於世，凡所為文，無非利眾。其為佛學儒學之類，固皆智悲雙運，弘護兼施，可為離苦之良導。即如醫學詩文，亦是圓融道藝，與人出塵之思。故由各類之文，悉見師之悲心弘願。嗟夫，吾師雖去，吾師之心願猶在人間。全集行將陸續付鐫，編輯同人命序其端，不敢辭以譎陋，謹述事要不文以應之。

中華民國七十七年戊辰五月弟子周家麟、徐醒民敬識

第一冊 佛學類之一

佛說阿彌陀經摘注接蒙義蘊合刊

李炳南老居士全集

佛學類之一

第一冊之一

佛說阿彌陀經摘注接蒙義蘊合刊 目錄

李炳南老居士全集序	一
佛說阿彌陀經摘注接蒙	一
佛說阿彌陀經經文	一
弁言	一三
凡例	一五
法會眾證分第一	二一
佛土依正分第二	三四
寶樹蓮池分第三	三七

天人供養分第四	·····	四一
禽樹演法分第五	·····	四四
佛德無量分第六	·····	四八
往生發願分第七	·····	五三
脩持正行分第八	·····	五五
同讚勸信分第九	·····	五九
聞法信願分第十	·····	七〇
互讚感發分第十一	·····	七五
流通普度分第十二	·····	七九
阿彌陀經名數表解	·····	八一

佛說阿彌陀經義蘊

小引	一二九
經題	一三三
法會眾證分第一	一三四
佛土依正分第二	一三六
寶樹蓮池分第三	一三九
天人供養分第四	一四四
禽樹演法分第五	一四七
佛德無量分第六	一五四
往生發願分第七	一五七
修持正行分第八	一五八
同讚勸信分第九	一六三
聞法信願分第十	一六六

互讚感發分第十一	……	一六八
流通普度分第十二	……	一七一
阿彌陀經義蘊題偈	……	一七三

佛說阿彌陀經

姚秦三藏法師鳩摩羅什譯

如是我聞。一時。佛在舍衛國。祇樹給孤獨園。與大比丘僧千二百五十人俱。皆是大阿羅漢。衆所知識。長老舍利弗、摩訶目犍連、摩訶迦葉、摩訶迦旃延、摩訶俱絺羅、離婆多、周利槃陀伽、難陀、阿難陀、羅睺羅、憍梵波提、賓頭盧頗羅墮、迦留陀夷、摩訶劫賓那、薄拘羅、阿菟樓駄。如是等諸大弟子。并諸菩薩摩訶薩。文殊師利法王子、阿逸多菩薩、乾陀訶提菩薩、常精

進菩薩。與如是等諸大菩薩。及釋提桓因等。無量諸天大衆俱。

爾時。佛告長老舍利弗。從是西方。過十萬億佛土。有世界。名曰極樂。其土有佛。號阿彌陀。今現在說法。舍利弗。彼土何故名爲極樂。其國衆生。無有衆苦。但受諸樂。故名極樂。又舍利弗。極樂國土。七重欄楯。七重羅網。七重行樹。皆是四寶周匝圍繞。是故彼國。名爲極樂。又舍利弗。極樂國土。有七寶池。八功德水。充滿其中。池底純以金沙布地。四邊階道。金、銀、瑠璃、玻瓈合成。上有樓閣。亦以金、銀、瑠璃、玻瓈、磲

磬、赤珠、瑪瑙。而嚴飾之。池中蓮華。大如車輪。青色青光。黃色黃光。赤色赤光。白色白光。微妙香潔。舍利弗。極樂國土。成就如是功德莊嚴。

又舍利弗。彼佛國土。常作天樂。黃金爲地。晝夜六時。雨天曼陀羅華。其土衆生。常以清旦。各以衣祴。盛衆妙華。供養他方十萬億佛。卽以食時。還到本國。飯食經行。舍利弗。極樂國土。成就如是功德莊嚴。

復次。舍利弗。彼國常有種種奇妙雜色之鳥。白鶴、孔雀、鸚鵡、舍利、迦陵頻伽、共命之鳥。是諸衆鳥。晝夜六時。出和雅音。其音演暢。五根、五力、七菩提分、八

聖道分。如是等法。其土衆生。聞是音已。皆悉念佛、念法、念僧。舍利弗。汝勿謂此鳥。實是罪報所生。所以者何。彼佛國土。無三惡道。舍利弗。其佛國土。尚無惡道之名。何況有實。是諸衆鳥。皆是阿彌陀佛。欲令法音宣流。變化所作。舍利弗。彼佛國土。微風吹動。諸寶行樹。及寶羅網。出微妙音。譬如百千種樂。同時俱作。聞是音者。自然皆生念佛、念法、念僧之心。舍利弗。其佛國土。成就如是功德莊嚴。

舍利弗。於汝意云何。彼佛何故號阿彌陀。舍利弗。彼佛光明無量。照十方國。無所障礙。是故號爲阿彌陀。

又舍利弗。彼佛壽命。及其人民。無量無邊阿僧祇劫。故名阿彌陀。舍利弗。阿彌陀佛成佛以來。於今十劫。又舍利弗。彼佛有無量無邊聲聞弟子。皆阿羅漢。非是算數之所能知。諸菩薩衆。亦復如是。舍利弗。彼佛國土。成就如是功德莊嚴。

又舍利弗。極樂國土。衆生生者。皆是阿鞞跋致。其中多有一生補處。其數甚多。非是算數所能知之。但可以無量無邊阿僧祇說。舍利弗。衆生聞者。應當發願。願生彼國。所以者何。得與如是諸上善人。俱會一處。舍利弗。不可以少善根福德因緣。得生彼國。舍利弗。

若有善男子善女人。聞說阿彌陀佛。執持名號。若一日、若二日、若三日、若四日、若五日、若六日、若七日。一心不亂。其人臨命終時。阿彌陀佛。與諸聖衆。現在其前。是人終時。心不顛倒。卽得往生。阿彌陀佛極樂國土。舍利弗。我見是利。故說此言。若有衆生。聞是說者。應當發願。生彼國土。

舍利弗。如我今者。讚歎阿彌陀佛。不可思議功德之利。東方。亦有阿閼鞞佛、須彌相佛、大須彌佛、須彌光佛、妙音佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等衆生。當

信是稱讚不可思議功德、一切諸佛所護念經。舍利弗。南方世界。有日月燈佛、名聞光佛、大燄肩佛、須彌燈佛、無量精進佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等衆生。當信是稱讚不可思議功德、一切諸佛所護念經。舍利弗。西方世界。有無量壽佛、無量相佛、無量幢佛、大光佛、大明佛、寶相佛、淨光佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等衆生。當信是稱讚不可思議功德、一切諸佛所護念經。舍利弗。北方世界。有燄肩佛、最勝音佛、難沮

佛、日生佛、網明佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等衆生。當信是稱讚不可思議功德、一切諸佛所護念經。舍利弗。下方世界。有師子佛、名聞佛、名光佛、達摩佛、法幢佛、持法佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等衆生。當信是稱讚不可思議功德、一切諸佛所護念經。舍利弗。上方世界。有梵音佛、宿王佛、香上佛、香光佛、大燄肩佛、雜色寶華嚴身佛、娑羅樹王佛、寶華德佛、見一切義佛、如須彌山佛。如是等恆河沙數諸佛。各於

其國。出廣長舌相。徧覆二千大千世界。說誠實言。汝等衆生。當信是稱讚不可思議功德、一切諸佛所護念經。

舍利弗。於汝意云何。何故名爲一切諸佛所護念經。舍利弗。若有善男子善女人。聞是經受持者。及聞諸佛名者。是諸善男子善女人。皆爲一切諸佛之所護念。皆得不退轉於阿耨多羅三藐三菩提。是故舍利弗。汝等皆當信受我語。及諸佛所說。舍利弗。若有人。已發願。今發願。當發願。欲生阿彌陀佛國者。是諸人等。皆得不退轉於阿耨多羅三藐三菩提。於彼國土。若已

生。若今生。若當生。是故舍利弗。諸善男子善女人。若有信者。應當發願。生彼國土。

舍利弗。如我今者。稱讚諸佛不可思議功德。彼諸佛等。亦稱讚我不可思議功德。而作是言。釋迦牟尼佛。能爲甚難希有之事。能於娑婆國土。五濁惡世。劫濁、見濁、煩惱濁、衆生濁、命濁中。得阿耨多羅三藐三菩提。爲諸衆生。說是一切世間難信之法。舍利弗。當知我於五濁惡世。行此難事。得阿耨多羅三藐三菩提。爲一切世間說此難信之法。是爲甚難。

佛說此經已。舍利弗及諸比丘。一切世間天人阿修羅

等。聞佛所說。歡喜信受。作禮而去。

佛說阿彌陀經終

弁言

淨土教法。都攝羣機。三經並曜。若天日星。普徧法界。靡不照臨。其間小本彌陀。收攝尤廣。四法修習。無妨殊程。開端治經。罔不由始。惟此經言似淺顯。義實玄幽。古德虞人不解。空遊寶山。競起宣揚。代有注釋。抉微啓密。奧旨大彰。方知真實教體。卽在於斯。不須別藉華嚴以贊之也。嘗取諸家注疏。周徧涉獵。或明乎心性。或圓其事理。或判科精嚴。或析句詳盡。分枝吐芳。皆有獨到。惜乎初學。力有未充。徧讀則勢所難能。擇一又失之摸象。求其義句通詮。言淺旨備之作。愧予譾陋。而竟未獲覩焉。近人雖有直解句解。白話等著。非傷之繁。卽病乎略。其於啓蒙之功。總未覺其盡洽。蘆橋之役。避兵入川。時應淨侶之邀。各地開演。因取疏鈔擷補。作爲範本。根雖等差。語尙契衆。積久集其摘錄。遂成卷

帙。至經中未釋之文。妄僭補足。間亦旁引他書。附加考證。名數則列表另疏。爲免畏繁生厭也。稿脫自視。堪助初機。久藏行篋。未正有道。歲庚寅春。僑寓香島。復值郵路烽塞。貝葉絕源。賓主緇素。乃有印經提倡。愆惠付梓。俾公流通。爰出是編。權乘其乏。志在利生。詎計工拙。固知餽釘之誚。自不免於大雅。然凌華嶽浮滄溟。以此小作梯航。似亦未始無補云爾。

庚寅暮春編者識於寄漚軒

凡例

一、此編采彌陀疏鈔擷補爲藍本。編排仍依其式。所以存其原型。於前人不掠其美。不亂其例也。

一、此編主旨。爲便初機自修。故采擷補一書增刪以次之。因擷補析句解釋。簡而易明。語錄古德。要而有本。

一、擷補分經爲十二分。無序正通三分之嚴整。無科判條貫之精詳。自不適今講席規範。然爲蒙拾易求而取之。實非有所主張也。若開講座。仍須參古德科判。分節歸納爲宜。

一、只取乎簡。亦有畧而不達之弊。如名相名數等。有非數語所能詳盡。勢又不能忽之。故於後另附表解一編。可檢對照。不於經中並列者。爲減初機生畏心也。

一、凡古注或涉深奧。或及名相者。則加疏以釋之。

一、凡經文有顯明易解之句。古注畧而不及者。爲順語必有解。茲皆妄僭補出。

一、凡經文則標大字頂格。古德之注。皆低一格。僭附者再低一格。以期醒目。

一、原有之十二分題目。雖存其舊。但皆從經中剔出。眉於格外。免同昭明分經而招過也。

編者附識